

ROZÁRIU – LORON KADEIRA S. PEDRO NIAN

(22 Fevreiro)

Introdusaun: Festa Kadeira S. Pedro nian, mak oportunidade ida atu harohan ba Amu-Papa Francisco, susesor S. Pedro nian, ba ninia intensaun sira. Ita harohan liuhusi Maria Virjen, ne'ebé Papa Francisco iha ligasaun metin, hanesan ita haree iha ninia logo Papa nian. Defaktu iha sorin karuk iha kraik, ita hetan fitun ida, simboliza Virjen Maria, Kristu no Kreda nian Inan. Papa Francisco bolu nia "Fitun evangelizasaun nian". Ita sei harohan hodi kontempla mistériu sira Ksolok nian ho tulun husi Papa Francisco nia liafuan sira.

Salve Regina

MISTÉRIU 1 – ANUNSIASAUN: "MARIA DEHAN: "NE'E SÁ, NA'I NIA ATAN OAN MAK NE'E. HALO TUIR ITA LIAFUAN BA!" (Lc 1,38).

Intensaun: Ita harohan ba seminarista sira, formande sira no foin-sa'e sira ne'ebé ne'ebé buka hela Maromak nia hakaran ba sira.

L1: Momentu dahuluk iha anunsiasaun – rona

Papa Francisco nia liafuan sira:

«Momentu dahuluk, ida rona nian, hatudu ho Anju nia liafuan sira: «Keta ta'uk Maria [...] Ó sei kous no tur ahi Oan-Mane ida, ne'ebé ó sei hanaran Jezús» (vv. 30-31). Maromak mak nafatin foti insiativa atu bolu hodi tuir Nia... Nia nafatin la'o uluk ba ita, Nia loke dalan iha ita-nia moris. Presiza prontu nafatin no disponivel atu rona no simu Maromak nia lian, ne'ebé ita labele rekoñese iha tarutu no iha ajitasaun nia laran... Maria konvida joven sira atu tun iha nivel kle'an no sintoniza an ho Maromak!» (Papa Francisco nia Diskursu iha Loreto, 25 Marsu 2019).

Knananuk: Ave Maria, cheia de graça, o Senhor é convosco. Bendita sois vós entre as mulheres!

L2: Momentu daruak iha anunsiasaun - dixerne

Papa Francisco nia liafuan sira:

«Momentu daruak ba vokasaun ida-idak mak dixernimentu, haktuir iha Maria nia liafuan sira: «Ne'e sei sai oinsá loos?» (v. 34). Maria la duvida; ninia pergunta la'ós tan kuran fiar maibé esprime ninia hakaran atu deskobre Maromak nia "surpreza sira". Iha pergunta ne'e hatudu atensaun atu komprende eziénsia hotu Maromak nia projetu nian ba nia moris, atu koñese ninia aspetu hotu. Atu halo ninia kolaborasaun sai responsavel liután no kompleta liután. Ida-ne'e mak atitude própria discípulo nian» (Papa Francisco nia Diskursu iha Loreto, 25 Marsu 2019).

Knananuk: Ave Maria, cheia de graça....

L3: Momentu datoluk anunsiasaun: deside

Papa Francisco nia liafuan sira:

«Desizaun mak pasajen datoluk ne'ebé karakteriza vokasaun sarani ida-idak, no haktuir iha Maria nia resposta ba Anju: «Halo tuir Ita-nia Liafuan bá!» (v. 38). NInia "sim" ba Maromak nia projetu salvasaun, realiza liuhusi Enkarnasaun, mak entrega nia moris rasik ba Nia. "Sim" ida laran-metin ne'ebé nakonu no disponibilidade totál ba Maromak nia vontade. Maria mak modelu vokasaun hotu nian no inspiradora ba pastorál vokasionál hotu-hotu: joven sira ne'ebé buka ka husu kona-ba sira-nia futuro, bele hetan iha Maria, tulun atu dixerne Maromak nia planu ba sira no forsa atu adere ba planu Maromak nian» (Papa Francisco nia Diskursu iha Loreto, 25 Marsu 2019).

Knananuk: Ave Maria, cheia de graça...

MISTÉRIU 2 – VIZITASAUN: “IHA LORON HIRAK NE’EBÁ MARIA HIIT AN LALAI BA FOHO, BA KNUA IDA IHA JUDA. TO’O TIHA ZACARIAS NIA UMA, NIA KUMPRIMENTA ISABEL” (Lc 1,39-40).

Papa Francisco nia liafuan sira:

«Maria, bainhira vizita Isabel, saida mak Maria lori ba nia? Jezús. Kreda lori Jezús: ne’e mak sentru Kreda nian, lori Jezús! Se, nu’udar ipóteze, akontese katak Kreda la lori Jezús, nia mak Kreda mate ida! Kreda tenke lori Jezús nia karidade, Jezús nia domin, Jezús nia karidade» (Papa Francisco iha Audiénsia Jerál, 23 Outubru 2013).

Intensaun: Ita harohan atu ema hotu moris iha fraternidade hahú husi hanoin malu iha orasaun.

MISTÉRIU 3 – JEZÚS MORIS IHA BELÉM: “WAINHIRA SIRA SEI IHA BELÉM, MARIA NIA LORON ATU TUR AHI TO’O DAUDAUN. NIA TUR AHI NIA OAN MANE BOOT, NO FALUN NIA HO NERAS” (Lc 2,6-7).

Papa Francisco nia liafuan sira:

L1: «Jezús moris iha balada nia luhan, maibé ho Maria Virjen no S. José nia domin ne’eb’éhakohak nia. Hodi moris iha isin, Maromak Oan konsagra domin familiár... Natál sai okaziaun atu família sira deskobre hikas nu’udar bersu moris no fiar nian, fatin domin maksimum nian, diálogu nian, perdaun nian, solidariedade fraterna no partillada nian, fonte dame ba umanidade tomak» (Urbi et Orbi, 25 Dezembru 2020).

Intensaun: Ita harohan ba foin-sa’e sira ne’bé prepara an ba matrimóniu no ba família sira, atu hodi comunidade nia apoiu, sira bele buras iha domin ho jenerozidade, fidelidade no pasiénsia.

Knananuk: Ave Maria

MISTÉRIU 4 – APREZENTASAUN NA’I NIAN: “Sira lori labarik ba Jerusalém atu saran Nia ba Na’i, nu’udar hakerek ihaLei Moisés nian (Lc 2,22).

Papa Francisco nia liafuan sira:

L2: «Jezús bá hasoru ninia povu. Festa enkontru nian: Kosok-Oan hasoru tradisaun templu nian; promessa sai realizasaun; Maria no José, joven, hasoru Simeão no Ana, katuas-ferik... buat hotu hasoru malu, bainhira Jezús to’o. Saida mak ne’e hotu signifika mai ita? Uluknanai, katak ita mós simu bolun atu simu Jezús, ne’ebé mai hasoru ita. *Hasoru Nia:* ita tenke hasoru Maromak moris nian loroloron; la’ós okazonalmente, maibé loroloron. Tuir Jezús la’ós desizaun ida foti dala ida de’it ba hotu; ne’e mak opsaun diária ida. No ita la hasoru Na’i virtualmente, maibé diretamente, hodi hasoru Nia iha moris, moris konkreta». (Omilia 2 Feveireiru 2019).

Intensaun: Ita harohan ba konsagradu no konsagrada sira, atu fiél ba enkontru ho Maromak iha orasaun nune’e, bele fó sasin ho brani no kriatividade iha Espíritu Santu.

MISTÉRIU 5 – JEZÚS LAKON NO LIU LORON TOLU HETAN FALI IHA TEMPLU: “Liu tiha loron tolu, sira hetan fali Nia iha templu, tur hela iha ema matenek sira leet, hodi rona no husu sira” (Lc 2,46).

Papa Francisco nia liafuan sira:

L1: «Virjen Maria no nia espozu simu Oan [Jezús], kuida nia no haree oinsá Nia sai boot iha idade, sabedoria no grasa iha sira leet, maibé liuliu Nia sai boot iha sira fuan; no neineik-neineik aumenta sira-nia afetu no komprensaun ba Nia. Sira laran-susar bainhira lakon Jezús, no ida-ne’e tenke sai ita-nia laran-susar mós bainhira ita *dook husi Nia*, dook husi Jezús. Ita tenke laran-susar bainhira liu loron tolu mak ita haluha Jezús, la harohan, la lee Evanjellu, la sente nesesidade ba ninia prezensa no ninia amizade ne’ebé konsola» (Angelus 30 Dezembru 2018).

Intensaun: Ita harohan ba Kreda atu simu husi Espíritu Santu kbiit atu hafoun an iha roman Evanjellu nian, iha tempu forte ida-ne’e.

Knananuk finál: O Maria Vergine potente